



## ՀԱՅԱՍՏԱՆԻ ՔՐԻՍՏՈՆԵԱԿԱՆ ԴԱՍՏԻԱՐԱԿՈՒԹՅԱՆ ԴՊՐՈՑՆԵՐԻ ՈՒՍՈՒՑԻՉՆԵՐԻ ՄԵԿՕՐՅԱ ՀԱՄԱԳՈՒՄԱՐ ՄԱՅՐ ԱԹՈՌՈՒՄ

Տարիներ առաջ էր, դեռևս երջանկահիշատակ Վազգեն Ա Կաթողիկոսի հայրական օրհնությամբ հոգևոր նեմարանի շրջանավարտ՝ Մայր Աթոռ Սուրբ Էջմիածնի երիտասարդ միաբան վարդապետների ջանադիր աշխատանքի շնորհիվ մանկան նման առաջին անհաստատ քայլերով իր գործունեությունը սկսեց Մայր Աթոռին կից Քրիստոնեական դաստիարակության կենտրոնը: Նախաձեռնությունը ինքնաբուխ էր, նպատակը՝ սուրբ: Կյանքի կոչված Քրիստոնեական դաստիարակության կենտրոնը դարձավ կազմակերպված ուսումնական մի կառույց, ազնիվ ու բարի գործը գտավ իր նրվիրյալներին, որոնց մեջ հայ մանկանը քրիստոնեաբար կրթելու, Ավետարանի շնչով սնուցանելու Ս. Սահակ Պարթև Հայրապետի և Ս. Մեսրոպ Մաշտոցի հոգեկան խնովքն ու հավատո հոգին խոսեց:

Սույն թվականի օգոստոսի 24-ին քրիստոնեական դաստիարակության գործը լավագույնս և արդյունավետ կազմակերպելու նպատակով, Վեհարանի հանդիսությունների դահլիճում, ուսումնական նոր տարեշրջանի բացման առիթով, տեղի ունեցավ Հայաստանի քրիստոնեական դաստիարակության դպրոցների ուսուցիչների մեկօրյա համագումար: Համագումարի բացումը կատարվեց Ն. Ս. Օ. Տ. Տ. Գարեգին Ա Ամենայն Հայոց Կաթողիկոսի բարձր նախագահությամբ և մասնակցությամբ Մայր Աթոռի դիվանավետ Տ. Ներսես արքեպս. Պոզապալյանի, Արարատյան Հայրապետական թեմի առաջնորդական փոխանորդ Տ. Գարեգին արքեպս. Ներսիսյանի, «Էջմիածին» ամսագրի խմբագիր Ասողիկ եպս. Արիստակեսյանի, Տ. Անանիա եպս. Արաբաջյանի, Տ. Միքայել ծ. վրդ. Աջապահյանի և Տ. Վազգեն արքեպս. Միրզախանյանի: Համագումարին իրենց մասնակցությունն էին բերել դա Միրզախանյանի: Համագումարին իրենց մասնակցությունն էին բերել կրոնի ուսուցիչ-ուսուցչուհիներ Երևանից, Էջմիածնից, Գորիսից, Դիլիջանից և Արտաշատից:



Առավոտյան ժամը 10.00-ն է, խմբովին արտասանված «Հայր մեր»-ից, «Էջմիածինն ի Հօրէ» և «Որք Զարդարեցին» շարականների կատարումից հետո, բացման խոսքով հանդես է գալիս Քրիստոնեական դաստիարակության կենտրոնի տնօրեն հոգեշնորհ Տ. Վազգեն արքեպիսկոպոս Միրզախանյանը: Իր խոսքում Հոգեշնորհ Հայր Սուրբը, անդրադառնալով Քրիստոնեական դաստիարակության կարևորությանն ու ծրագրյալ կերպով այն կազմակերպելու խնդրին, նշում է. «Կենտրոնի գործունեության ծրագիրը հստակ է՝ քարոզով ու Աստվածապաշտությամբ կրթված մի սերունդ դաստիարակել՝ արժանի Հիսուսի անվան, արժանի նրա մարդասիրության և Աստծու որդեգրության:

Ահա այս նպատակով Երևանում, Էջմիածնում, Արտաշատում և հանրապետության մի շարք շրջաններում կենտրոնին անդամագրված 200-ից ավելի ուսուցիչներ իրենց նվիրական առաքելությունն են ծավալել 35 կիրակնօրյա և 25 քրիստոնեական դաստիարակության կենտրոններում»:

Գարեգին արքեպիսկոպոսի ողջույնի խոսքից հետո, «Քրիստոնեական դաստիարակության նկարագիրը և հիմնական մեթոդաբանությունը» թեմայով դասախոսությամբ հանդես է գալիս Ն. Ս. Օ. Տ. Տ. Գարեգին Ա Ամենայն Հայոց Կաթողիկոսը: Վեհափառ Հայրապետի հետաքրքիր և բովանդակալից դասախոսությունը կենդանի աշխույժով է լցնում լսարանը: Դասախոսության ընթացքին Վեհափառ Հայրապետը, անդրադառնալով մեթոդաբանության հարցերին, կենտրոնանում է մեթոդաբանության այն շորս եղանակների վրա, որոնց գործադրությունը կնպաստի կրոնի ուսուցմանը:

1. Կրոնի դասն սկսել աղոթքով:
2. Ծշտել տվյալ դասի ուսուցանվող հիմնական ճշմարտությունը:
3. Ուսուցանվող դասի՝ գիտելիքների հետ աղոթքի եղանակները սովորեցնելու հնարավորություն ստեղծել:
4. Յուրաքանչյուր դասի ընթացքում Եկեղեցու նշանավոր Հայրերից կամ Նոր Կտակարանից ընտրված մի խոսք սովորեցնել աշակերտներին:

Վեհափառ Հոր դասախոսությունն ավարտվում է ուսուցիչների կողմից մեթոդաբանական ամենատարբեր բնույթի հարցադրումներով:

«Եկեղեցին Հայկական» երգի կատարումից և մեկժամյա ընդմիջումից հետո «Աստվածաշնչի դերը մանկան նկարագրի ձևավորման գործում» թեմայով դասախոսություն է կարդում Մայր Աթոռի դիվանապետ Գերաշնորհ Տ. Ներսես արքեպիսկոպոս Պոզնապալյանը: Սրբազան Հայրն իր դասախոսությունը սկսում է Հին Կտակարանյան ժամանակաշրջանում տիրող բարքերի, մտայնության նկարագրով՝ այդ ամենի մեջ տալով անհրաժեշտությունը Հիսուսի Գալստյան՝ ամբողջացնելով իր խոսքը այն կարևոր իրողություններով, որոնք նպաստում են մանկան առողջ դաստիարակությանը:

Ներսես արքեպիսկոպոսի դասախոսության ավարտին հնչում է «Ուրախ լեր Սուրբ Եկեղեցի» շարականը:

Օրվա երկրորդ կեսին, ժամը 15.00-ին, սկսվում է հերթական դասախոսությունը՝ «Ընտանեկան դաստիարակության կարևորությունը մանկան քրիստոնեական նկարագրի ձևավորման գործում». դասախոս՝ Տ. Միքայել Տ. վրդ. Աջապահյան: Հոգեշնորհ Հայր Սուրբը մանկավարժ-հոգեբանի բացառիկ հմտությամբ և նյութին լավագույնս տեղյակ խոր մասնագիտական



վերլուծումներով կարևորում է քննադատական դաստիարակության դերը մանկան քրիստոնեական նկարագրի ձևավորման գործում:

Այնուհետև «Համառոտ ակնարկ կրոնական դաստիարակության պատմության» թեմայով դասախոսում է Մաշտոցյան Մատենադարանի ավագ գիտաշխատող, բանասիրական գիտությունների թեկնածու պրն. Արուաշես Մաթևոսյանը:

Այնուհետև, ըստ նախատեսված ծրագրի, տեղի է ունենում հավաքական քննարկում արժարժված նյութերի և հարցերի շուրջ:

Վերջում Վեհափառ Հայրապետը եզրափակիչ օրհնության խոսքով մի քանի թելադրություններ է անում բոլորին. «Դաստիարակության գործը մըշտական է եղել, է՛ ու կա՛, իսկ մեզ մնում է անցյալից սովորելով, անցյալի փորձին նայելով մեր սերունդների ներկան կերտենք բարոյական ամուր հիմքերի վրա՝ միշտ նոր սպասելիքներով ու նոր հույսերով»:

Համագումարն ավարտվում է «Պահպանիչ» աղոթքով և խմբովին երգված «Հայր մեր»-ով:

ՎԱՐՈՒԺԱՆ ՍՐԿ. ՏԵՐՏԵՐՅԱՆ

